

BONERIANO®

EDITOR:
Bonaire Communication Services N.V.

Djaweps 5 yanüari 2023 | Preis:\$1.00

WARDA DI POLIS PELIGER PA SALÚ

Ajmal Zahir Ishadai promé beibi di 2023



Bonaire a konosé su promé beibi di aña ku a nase dia 4 di yanüari 2023 eksaktamente 00:31 di mainta i ku ta pisa 3790 Gram i midi 52 cm. Djárason 4 di yanüari Maduro & Curiel's Bank, a bishitá e promé beibi di aña. Naturalmente tresiendo regalu pa e yu.

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



xerox™



OBERSI
ELECTRONICS
BONAIRE

cityshopbonaire.com

City Shop Bonaire

+599 700.6442

+599 717.3666

City Shop
Smart shopping • Better living



Lider polítiko di MPB, Elvis Tjin Asjoe:

Elekshon ta un trayekto largu

KRALENDIJK -- Elekshon ta un trayekto largu, esaki lider polítiko di MPB, Elvis Tjin Asjoe, a bisa durante programa di e partido na Bonaire.tv. Nos tin basta luna kaba ta prepará pa reklutá kandidatonan nobo. Nos tin algun kandidato nobo.

E organisashon di elekshon mes tin un grupo ku ta yuda nos prepará e parti di merkadeo i rekoudá fondo. Pues nos tin lunanan ta preparando, pero ta bai stap pa stap.


Kontrario na e promé elekshon ku a bai na 2015 a kore kampaña un aña i mei

promé, e di dos un par di luna promé i awor a sprent lo ta poko mas kòrtiku, pero ku bon preparashon, pasobra nos tin gobernashon pa atendé kuné, nos ta den Konseho Insular tambe i dor di esei nos ta mas visible i tin mas instrumento pa bai elekshon kuné pa e komunidad por mira i skucha nos i finalmente por husga nos tambe di loke nos a primintí den nos programa di akshon na 2019 i krea nos programa i gobernashon, huntu ku UPB i awor nos ta bai komuniká e logronan pa pueblo por husga nos sí nos a hasi loke nos ta bisa, Tjin

Asjoe a bisa.

Tjin Asjoe a sigui bisa, den kuminsamentu tempu ku nos a lanta MPB, tabata fásil pa haña kandidato. Tabatin un sintimentu grandi ku tin algu nobo. Awor ku MPB tei i ta hasiendo un bon trabou i duna oportunitat na lidernan nobo pa traha pa e komunidad i huntu ku resultadonan ku nos ta logrando ta mirando desaroyo rònt Boneiru.

Niun hende no por desmentí ku Boneiru no ta bayendo bon i esei tin di aber ku gobernashon di último aña ku MPB a partisipá aden.



A bai sosegá den brasa di Señor

Norma U. Reigina

*16-05-1943 † 28-12-2022

Na nòmber di su yunan:

Igor Jansen i famia
Rosann Hayquetin-Jansen i famia

su nietunan:

Shana Jansen i Isha Jansen

amigu di famia:

Bernardo Laken

su rumannan:

Irena Hart i famia

Ilia Hart i famia

Errol 'Bòì' Reigina i famia

Elsio Obispo i famia

Elder Servinus i famia

Irene 'Poppy' Martina-Reigina i famia

Erwin Reigina i famia

Marvis Davelaar-Reigina i famia

Elvira Reigina i famia

Ludmila Reigina i famia

Sonia Maria-Reigina i famia

Astrid Reigina i famia

Su tio: Julio 'Djúl' Reigina i famia

Su primu- i primanan, subrino- i subrinanan, amiga- i amigunan

Demas famia:

Reigina, Hart, Goeloe, Hooi, Doran, Andrea, Isenia i de Palm.

Si den nos tristesa nos por a lubidá un famia, nos diskulpa pa esei.

Un danki na Dr. Post i e tim i boluntarionan di Kas Flamboyan.




Despedida ta djasabra 7 yanüari na misa La Virgen de Coromoto na Antriol.

Ta risibi kondolensia di 1'or pa 3'or na misa.

Entiero ta tuma lugá den santana katóliko na Playa.

Despues di entiero NO por risibi bishita di kondolensia na kas.



Salmo 23:6

*Si, bendishon i bondat ta kompañá mi tur día di mi bida.
Lo mi biba den kas di señor henter mi bida largu.*

Ku tristesa den nos kurason nos ta partisipá fayerimentu di nos kerido

Feliciano Juan de Palm

mihó konosí komo
'Shòròmbu of Driem'



Su kasá: † Yvonne De Palm-Salas

Su yu: † Darryl De Palm

Su yunan:

Darlene Leonora-Kalaykhan,
esposu i yunan.

Dorian Kalaykhan i yunan

Rudy Leonora i yunan

Desiree Kalaykhan i yunan

Heinrich Kalaykhan i yunan

Faried Kalaykhan i esposa

Su niétu:

Darryl de Palm junior i demas nietu- i nietanan.

Su ruman:

Monica de Palm, biuda di Raphaela

Subrino- i subrinanan

Maria Seraus i rumannan.

Elma Makaai i rumannan.

Reynold Mercera i rumannan.

Reginald De Palm i ruman.

Primu- i primanan

Genoveva Rosaria i ruman

Otilio Wanga i ruman

Demas famia:

de Palm, Salas, Kalaykhan, Leonora, Reina, Seraus, valentijn,
Jansen, Makaai, Mercera, Rosario Wanga, Raphaela, Diana i
Lotero.

Si den nos tristesa nos por a lubidá un òf otro famia, amigu
òf konosi, nos diskulpa.

Un danki na dokternan di Kas di Kuido, speshal dr. Peter de
Graaf, tim di aktivdat, staf i personal di Kas di Kuido Fundashon
Mariadal.

**Akto di entiero ta tuma lugá diabierna 6 januari na
Consuelo Memorial. Ta kuminsá risibi bishita di
kondolensia di 1'or pa 3'or di merdia. Sigi pa un respons
despues pa su último lugá di sosiegu den santana
'Nos Sosiego'**

**Pa motibunan fuera di nos boluntad nos NO por risibí
bishita di kondolensia na kas, despues di entiero.**

WARDA DI POLIS PELIGER PA SALÚ

KRALENDIJK-BONERIANO ta dispone di informashon ku e edifisio di warda di polis ta forma peliger pa salú di hende. Prinsipalmente e trahadónan ku ta kontinuamente den e edifisio ta eksperensia problemanan di salú pa motibu di kondishonnan di e edifisio.

Algun aña pasá a hasi investigashon konserni e edifisio na Kaya Libertador Simon Bolivar i a konstatá ‘sick building syndrome’, pues síndrome di edifisio malu. Básikamente esaki ta enserá ku personanan eksponé kontinuamente na e ambiente den e edifisio, ta bira malu.

BONERIANO a aserká Kuerpo Polisial Hulanda Karibense (KPCN) ku a konfirmá e investigashon hasi. “A hasi un investigashon tokante e klima den



e edifisio”, bosero di polis ta reakshoná. E ta enfatisá ku e tim di maneho a tuma e salú di e trahadónan na serio i a disidí pa hasi un investigashon independiente di e situashon den e edifisio.

E situashon

E terminologia di síndrome di edifisio malu ta un deskripsion di multitut

di kehonan di salú, prinsipalmente kehonan di wowo i respiratorio. Usuarionan di e edifisio ta eksperensia vários keho entre otro doló di kabes, kansansio, grawatamentu i pèrdida di konsentrashon.

Segun nos fuente, aktualmente tin trahadónan di KPCN malu pa motibu di e situashon aki i esaki alabes ta sòru pa inrankilidad na

boka di trabou. Bosero di KPCN ta splika ku e tim di maneho a risibí vários indikashon di trahadónan tokante empeorashon di e problema ku e humedat di aire den e edifisio. Alabes e ta agregá ku e investigashon no ta konkluí ku tin trahadó malu pa motibu di e síndrome aki.

Remarkabel ta e echo ku ya tin un rapòrt trahá tokante esaki i ku rekomendashonnan pa remediá e situashon. BONERIANO no ta dispone di e rapòrt. “E rapòrt no ta públiko. Kontenido di e rapòrt ta informashon interno”, segun e bosero.

Lógikamente e preguntata ta surgi, kiko KPCN ta hasi pa solushoná e situashon? “Kuerpo ta tuma

e resultadonan na serio i a bin na diferente akshon ku por repartí den akshon inmediato, akshon a korto plaso i akshon a largu plaso. A kompartí esaki ku trahadónan. Vários di e akshonnan aki ta den fase di implementashon”, e bosero ta kontestá.

Mirando ku seguridat laboral ta un aspekto sumamente importante pa un sindikato, BONERIANO a aserká sindikato Nacionaal Algemene Politie Bond (NAPB BES) pa nan reashon. Ainda nos ta warda riba nan reashon.

Di KPCN nos a komprondé ku e tim di maneho no a papia ku sindikato tokante e situashon aki. “Nò, nos no a hasi esaki?, e bosero ta bisa.

Anochi ku Luna Yen mañan na Zòzò Ranch

KRALENDIJK -- Sekshon di Kultura, Arte i Literatura (SKAL) i Komishon Di Luna Yen ta kontinuá ku aktividatnan segun su kalènder kultural. Mañan djabièrnè 6 di yanüari 2023 lo tin e evento ‘E Anochi Ku Luna Yen’ di 7or pa 9or di anochi na Zòzò Ranch serka Maria Seraus. E tema di e anochi ta “Aña Nobo, Bida Nobo”. Un anochi ku poesia bou di e luna yen. Anochi ku Luna Yen ta un evento sosial di pueblo i pa pueblo, pues un i tur ta kordialmente bonbiní.

Personanan di Rincon ku mester di transporte

por hasi uso di un bus ku ta sali for di pariba di misa di Rincon 18:00-or i despues tambe ta pasa na SKAL 18:30-or pa buska e personanan di Playa ku mester di transporte pa bai Zòzò Ranch. Ta pidi tur esnan ku ke hasi uso di e servisio di transporte pa hasi reservashon na tempu na SKAL of yama +599 715 5323. Di e forma aki nos por hiba un mihó komunikashon ku otro.

Manera semper, ta keda liber na kada bishitante pa trese algu di boka dushi pa kompartí ku otro bishitantenan i un súprika pa tur hende bini ku nan pro-

pio stul. No neglighá bo kapasidat i bin demostrá ku bo por. Nos ta apresia i respetá tur obra, ku eksepsion di palabranan bulgar, polítika, problemanan personal i tur loke ku no ta kuadra ku e meta di e evento.

Anochi ku Luna Yen ta un iniciativa ku a nase den pasado for di algun siudadano ku gran pashon pa nos idioma papiamentu. SKAL ta keda pone énfasis ku meta prinsipal di e evento pa stimulá otro pa skirbi, deklamá, konta storia, kanta òf presentá obranan kòrtiku na papiamentu.

5 di Yanüari 2023

**“Bin mira!”
(cf Huan 1,46)**

Esun ku tabatin i ku tin un eksperensia personal ku Hesus, tin un mishon partikular pa kompartí su eksperensia, ku esun ku ainda “no a mira” grandesa di Señor. **Filipo a bai yama su ruman Natanaël pa e tambe eksperensia e legria di mira Hesus; “... Esun ku tantu Moises komo profetan ta papia di dJE.” (cf Huan 1,45b)**

E manera di mas real pa kompartí nos eksperensia ku otro ta pa medio di nos ehèmpel di bida. (cf 1 Huan 3,11) I sea avisá ku nos lo pasa hopi prueba i sufrimentu, djis kòrda e sufrimentu ku Hesus a pasa pa ingratitud di hende. **Sin embargo El a insistí pa stima i salba nos. (cf Huan 3,16) Mara kada un di nos por eksperensia i kompartí e amor aki, apesar di tur prueba, doló i sufrimentu. (cf 1 Huan 3,13)**



**Danki Señor pa bo amor!
Hasi mi kurason pareu no bo kurason,
pa mi ta kapas pa stima manera Abo.**

1L 1 Huan 3,11-21; Salmo 100,2-5; Ev Huan 1,43-51

005999-522-4056 Un Snechil Pan unsnechilpan

Proyekto retenshon di awa

KRALENDIJK – Fundashon Echo a yama bon biní na tres studiante di siensia ambiental di Hulanda. Kada studiante ta kondusiendo proyektonan individual durante sinku luna i ta asistí pa Echo.

E proyekto di e studiante Ava ta investigá e mihó método pa oumentá retenshon

di awa den dos área di reforestashon di Echo, Kach'i Baka i Seru Largu.

A selektá e dos áreanan akí debí na nan kondishon degradá loke ta nifiká na momentu ku awa kai e awa no ta drenta suela, pero ta kore bai i asina e matanan no ta haña suficiente awa.

Komo parti di e proyek-

to, Ava a instalá dos diferente téknika di maneho di awa. Na Seru Largu a instalá 15 'Groasis Boxx's' i den e área di reforestashon na Kach'i Baka a pone dos dam.

A skohe e dos método akí di retenshon di awa basá riba tereno di e área, kaminda ku ta rekerí

maneho di rekursu i tempu.

Ava aktualmente ta monitòr i kompará e retenshon di nivel di awa den suela den ámbos área awor

ku e téknikanan di maneho di awa ta instalá pa determiná kon nan por yuda pa mehorá e retenshon di awa.



DETERMINASHON PA

AÑA NOBO

"Bo ta koroná e aña ku Bo bondat, i Bo berehanan ta gotia abundansia." Salmo 65:11(BS)

Aña Nobo, metanan nobo. Ta un frase ku nos ta tende kada aña di nobo. Realmente ta nesario pa pone metanan si nos no ta determiná pa kumpli ku nan?

Dios ta Esun ku ta koroná e aña nobo ku Su bondat. Si nos tin e deseo pa realisá nos metanan tin stapnan fásil ku nos por sigui huntu kunÉ.

Si nos ta determiná pa hasi esei, dal e siguiente stapnan akí:

- **Orashon (komunikashon) kontinuo ku nos Tata** – "hasi orashon sin stòp;" **1 Tesalonisensenan 5:17**
- **Lesu Beibel** – "Bendishoná ta esun ku lesa i esnan ku tende e palabranan di e profesia, i ku paga atenshon na e kosnan ku ta pará skirbí den djé; pasobra e tempu ta serka." **Revelashon 1:3**
- **Meditá i studia Dios Su Palabra** – "Awor esaki nan tabata hende di mentalidat mas nobel ku esnan na Tesalónika, pasobra nan a risibí e palabra ku bon boluntad i tabata skudriñá e Skrituranan tur dia, pa mira si e kosnan aki tabata asina." **Echonnan 17:11**
- **Ta un imitadó di Dios Su Palabra** – "Ma sea kumplidónan di e palabra i no solamente tendedónan ku ta gaña nan mes." **Santiago 1:22**
- **Hiba un bida guiá pa e Spiritu Santu** – "Pasobra tur esnan ku ta wòrdu guiá dor di e Spiritu di Dios, esakinan ta yunan di Dios." **Romanonan 8:14**

Pone meta ku determinashon!
Gilda Beukenboom-Sintjago

Produkshon PGM



Programanan di Bonaire.tv

TELBO kanal 70
Flamingo TV kanal 23

Djaweps 5 yanüari 2023

12.00 Aktualidat:	Gregory Colina
13.00 Aki Boneiru:	Julianaplein
13.30 Herensia:	Norma Reigina
15.00 BAPA:	Albertico Janga
16.00 Herensia:	Fructuoso Edgar Wanga
17.10 Aki Curaçao:	Izaline Calister
18.00 Herensia:	Bernadino Beaumont
19.00 BAPA:	Aramis Matheo [Kayak], Militarnan [Limpiesa Trapi Onima] & Krus
20.00 Programa Politiko :	MPB ta Informa Episodio 05
21.00 Aki Boneiru:	Sandy Gibbes
22.30 Herensia:	Equador (Montañita)

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

Kiko ta pasando ku SELIBON?

KRALENDIJK – “Kiko ta pasando ku e instansia ku ta responsabel pa mantené kayanan na Boneiru limpi,” siudadano Noel Janga ta puntra. “Ami a lanta for di chikitu na Boneiru tende di Reinigingsdienst ku tabata e instansia ku tabata kai bou di gobièrnu ku e tarea pa mantenshon di limpiesa i higiena. Esaki tabata enserá for di kumentu di sushi di kas, halamentu di berpùt, kumentu di bestia morto, pero tambe bariementu di kaya.”

Tempu ku tabata trahadónan ku basora na manriba kaya bariendo kayanan. Tur den dékada ochenta siendo un mucha di apénas dies aña. Awe nos ta tres dékada mas leu i Reinigingsdienst no ta eksistí mas, tampoko Gobièrnu di Boneiru no ta responsabel mas pa servisio di limpiesa pa ku e komunidad Boneri-

ano. Henter e servisio di limpiesa akí a bai ariba su mes, segun Janga.

Janga: “Segun informashonnan di e direktor di SELIBON den un programa di televishon pa informá pueblo, mi por a komprondé ku SELIBON aktualmente ta un kompania anónimo ku ta kai bou di supervishon di BHM. Tambe a mustra e desaroynan ku e kompania a hasi pa loke ta trata modernisashon den e forma di atendé ku sushi akí na Boneiru.”

Nos tur ta konsiente ku SELIBON ta bon ekipá ku ekiponan di trabou i sitio nan tantu aki na Playa pero tambe na Rincon, pa hiba tur tipo di sushi. Kaminda ta separá e sushinan tambe for di otro. No por bisa ku SELIBON no ta ekipá pa asumí e responsabilidat pa mantenshon di e isla limpi,

loke ta su tarea prinsipal, Janga ta skirbi.

Situashon interno

Janga ta sigui: “E aña ku a pasa nos tur ta konsiente di hopi turbulensia na SELIBON. Situashon ku a hiba na welgamentu di trahadónan. Sindikatonan mester a intervení pa purba na kalma e situashon pa trahadó ku a stòp di traha por a bai traha bèk pa asina sigui duna e komunidad e servisio ku nan ta spera di SELIBON. Pasobra tur luna nan ta paga pa risibí bon servisio.”

Algun siman despues di wèlga, despues ku direktorado di SELIBON, sindikatonan i otro konseheronan ku tabata purba yega mas pronto ku ta posibel na un solushon, a bin sali na kla ku a yega na un akuerdo. E motibu di e welgamentu tabata ku a primintí oumentu

di salario i no a kumpli ku esei p’esei mester a wèlga. E oumentu a bin despues, Janga ta trese dilanti.

Situashon den komunidad

Janga ta indiká ku kayanan di Boneiru ta yen di tera awor despues di un periodo di áwaseru fuerte pa tempu largu. Roinan a yena tur kaminda ku tera.

Un kaminda ku esaki ta bisto ta na altura di e rotònde na Misa di Playa. Tera a tapa e pista di baiskel kompletamente sierto kaminda. Esaki ta trese un situashon peligroso kuné pa peaton, siklista, scootmobil i motsiklista. Slepmentu, stòf i chèns ku piedra por sali for di bou di tayer di outo dal hende, ta inevitabel.

Pero ta straño pa hopi den komunidad ku no ta limpia e kayanan, bari manera

tur esnan ku ta paga impuesto di vehíkulo ta spera. Kiko ta pasando, Janga ta puntra. Di kon pueblo no ta risibí ningun informashon di kon kayanan ta permanesé sushi.

Konklushon

Janga: “Ami komo siudadano no por komprondé di kon Gezaghebber i su tim di maneho, koalishon i oposishon, ningun no ta aserká SELIBON pa puntra nan di kon nan no ta hasiendo e trabou kual ta un di nan tareanan i konsehá nan pa hasi esaki mas pronto posibel pa kua SELIBON ta risibí supsidio di gobièrnu pa hasi. Ki dia ta kuminsá bari e kayanan akí. Aunke den oranan di mardugá pasobra e forma kon e situashon akí a sali fo’i man no por hasi durante dia pa motibu di e kantidat di tráfiiko riba nos kareteranan.”

Kaminda pa Curoil den mal estado

KRALENDIJK -- E kaminda ku ta kondusí pa Curoil den besindario di Nawati, ta den mal estado. Sí esaki no ta basta, hopi biá sofokando riba e kaya akí pa yega Curoil, no ta haña bòter di gas chikitu.

Tempu a kuminsá ku konstrukshon di e fasilidat nobo di Curoil, a anunsiá ku ta bai yena gas na Boneiru mes, pero esaki a keda na palabra, nada di echo.


Parse ku algun dia pasá te asta un grupo di personal a blòkia e kaya pa asina demostrá nan mal kontentu.

Kiko ta kita sí Curoil pone un bòrchi na inisio di e kaya pa anunsiá ku no tin bòter di gas chikitu pa asina

evitá ku mester pasa den e fasilidat di Curoil, pa haña kaya malu akí pa yega e tende ku no tin gas.



Skirbí pa: Rudy Domacassé Eksperensia dushi



bil. Awor no tin bala ku por pasa mi.

Ku e kètsnan nobo na mi pia, mi mente ta bai bèk 200 aña atras. Dia mi a kuminsá tènìs, pia abou i tur atardi yega kas ku blar bou di mi pia.

Despues di algun luna ta chambuká leim i bolbe leim kèts pa por sigui tènìs, mi a pone un par nobo na mi pia. Un eksperensia dushi i sta-



Debí na violashon regla di privasidat

Instagram i Facebook ta haña but di miónes

KRALENDIJK – E organisashon di vigilansia di data irlandes, DPC, a pone dos multa pa Meta di un total di 390 mion euro, debí na violashon di regla di privasidat di Facebook i Instagram. Segun e supervisor, ta trata di usarionan ku no tabata sa presis kiko tabata sosodé ku nan data.

E investigashon di DPC a kuminsá despues ku dia 25 di mei 2018 a entregá dos keho kontra Meta, entre nan un keho di un akti-

vista privá di Oustria. Riba e dia ei reglanan di privasidat europeo, GDPR, tambe a drenta na vigor.

E denunsiantenan a haña ku tabata obligá usarionan pa aseptá e kondishonnan nobo di Instagram i Facebook, sino nan no por a hasi uso mas di e plataformanan. Den e kondishonnan tabatin ku usarionan mester duna pèrmit pa usa nan informashonnan personal.

E supervisor no a duna e denunsiantenan rason riba

e punto di pèrmit obligá, pero a haña ku Facebook i Instagram no tabata transparente suficiente tokante i di kon nan ke a hasi uso di e informashonnan personal. Esaki ta enpugna ku leinan di privasidat europeo.

P’esei Facebook a haña un but di 210 mion euro i Instagram 180 mion euro. E empresa di Mark Zuckerberg banda di esei a haña tres luna di tempu pa sí kumpli ku e kondishonnan.

Meta, meskos ku hopi



otro empresa teknológiko grandi, tin ofisina na Irlanda debí na e sistema di impuesto faborabel.

Pa e motibu ei e supervi-

sor ta mantené ei nan reglanan di privasidat europeo. Esaki ta di sinku biá ku Meta ta haña but di e supervisor irlandes.

Te pa tin gobernashon

Sin pueblo no por tin partido

KRALENDIJK – Edision Ellis di MPB ta salí for di kuna bèrdè. Su tio Rudy ‘Ruman’ Ellis ta un di e fundadónan di UPB, pero awor e ta afiliá na MPB i te asta tabata miembro di Konseho Insular.

Ellis durante e programa

di MPB na Bonaire.tv ta splika: “For di chikitu mi a lanta haña tur famia UPB i tambe a lanta den dje. Despues ku Rudy Ellis a sali i Ramonsito Boi tabata na kabes, mi a keda sostené e partido ketu bai. Despues a resultá ku Raimy, mi ru-

man, no tabata satisfecho mas kon kosnan tabata bai den partido i a bandoná partido.”

Sin e pueblo no por tin partido, te pa tin gobernashon. Semper, segun Ellis, el a bisa e ke drenta polítiko i subi lista di un

partido. Te un dia ku Elvis Tjin Asjoe a aserk’é i a puntra sí e ke djòin MPB i el a aseptá.

Pa loko ta trata su retiru temporal komo miembro di Konseho Insular, Ellis ta splika: “Mi salida di Konseho Insular tabata inesperadamente. Despues kontròl di dòkter ku a muestra ku mi mester bai Colombia i a resultá ku mester haña tratamentu. E tratamentu a dura kuater luna i mei i ora ku mi a bin bèk Boneiru, mi a spera ku manera e tratamentu a bai ku tur kos a bai bon, pero a bini hopi efekto despues di e tratamentu.

Awor tin mehoransa tur dia di nobo.

Pa e motibu ei, Ellis ta sigui splika, el a komuniká ku Elvis Tjin Asjoe i a bis’é ku e no ta kere di por kumpli ku e funshon di miembro di Konseho Insular. E ora ei el a traha su karta di retiru i a entregá su retiru temporal pa laga e kurpa rekuperá pa mi bin bèk.

“Polítika ta algu ku ta den mi sanger i mi gusta traha pa hende i ke mira pa tur hende haña tur loko nan tin derecho riba dje i loko nan meresé. Mi ta bin bèk pa traha pa e pueblo den su totalidat,” Ellis a bisa.

Hopi kerstboom a bai Kuskus

KRALENDIJK – Informashon di kua BONERIANO ta disponé ta indiká ku parse benta di kerstboom no a bai asina bon pa tur bendedó añá pasá. Tin di nan ku te asta mester a hiba hopi kerstboom no bendé pa Kuskus – Landfill. Benta di kerstboom a bai hopi

slow.

Diferente hende a komentá e echo ku kerstboomnan tabata hopi karu e temporada aki. Esaki tabata un fenómeno mundial. Kasi bo no por a haña un bon kerstboom bou di 100 dòler kumpra na Boneiru.

Loke lo por a afektá bendedónan lokal ta e echo

ku por a haña kertboom hopi tempran, kompará ku e otronan.

Na e punto di benta dilanti Stadion por a mira basta kerstboom ku no a bende banda di un kòntainer.

Fotógrafonan di BONERIANO a saka foto.



Polis a realisá basta detenshon den fin di aña

Kore bou di influensia ta alarmante

KRALENDIJK – Manehá outo bou di influensia di alkohòl a bira alarmante na Boneiru. Informashon suministrá pa polis ta papia palabra kla. Luna pasá, ku ta kargá di aktividat festivo, a realisá basta detenshon di shofùrnan betrá, no apto pa konduzí vehíkulo di motor. Tabatin aksidente tambe embolbí. Ta un situashon di preokupashon. **BONERIANO** ta pone e kasonan di luna pasá riba un rei.

Riba djaluna 19 di desèmber alredero di 12.15 or di mardugá un hit & run a tuma lugá riba Kaya Nikiboko Sùit. Dos vehíkulo a dal den otro i un di e shofùrnan a sigui kore. Shofùr di e otro vehíkulo a disidí di persiguí e vehíkulo ku a hui i a informá polis di e situashon ora tur dos outo a stòp di kore. A detené e shofùr di e outo ku a hui, un hòMBER di 36 aña di edat di inisial A.A.H.S., pa motibu di kore bou di influensia di alkohòl.

Kuerpo Polisial Hulanda Karibense ta konsehá públiko pa nan mesun seguridat pa no realisá un persekushon den situashonnan manera esaki. Bo por trese bo mes i otronan den peliger. Purba nota un deskripsion di e shofùr, i si ta posibel nota e plachi di number, bèl polis i keda warda pa asistensia na e sitio.

Skuter i bròmer

Djasabra 24 di desèmber alredero di 2.15 or di mardugá un patruya di polis a nota un persona ku tabata manehá di manera sospechoso riba un skuter riba Bulevar E.E.G. durante vigilansia general. Despues di un kòntrol, e shofùr a resultá ta bou di influensia di alkohòl. A detené un hòMBER di 23 aña di edat di inisial D.A.K.J.

Djasabra 17 di desèmber

alredero di 2.30 or di mardugá un detenshon a tuma lugá riba Kaya International pa motibu di manehá bou di influensia di alkohòl. Durante un patruya general, agentenan a para un motersaikel ku dos persona di kual unu no tabata tin un hèlm bisti. Durante e kòntrol e shofùr di e motersaikel a resultá ta bou di influensia di alkohòl. A detené un muhé di 18 di edat di inisial C.M.C.V.E.

Kòntrol

Riba djaweps 15 di desèmber alredero di 7.50 or di anochi un detenshon a tuma lugá na Hanchi Amboina durante un kòntrol di tráfiiko. Durante e kòntrol aki, shofùr di un vehíkulo no tabatin reibeweis i dokumento di seguro bálido i a resultá ta bou di influensia di alkohòl.

Mas investigashon a konstatá ku e shofùr no tabata por a mustra un pèrmit òf prueba di residensia bálido. A detené un hòMBER di 42 aña di edat di inisial M.R.M.N. pa manehá bou di influensia di alkohòl i a dun'e un but pa e echo ku e no por a mustra e dokumentashon nesesario. E kaso ta bou di investigashon na e departamento di servisio pa ekstranhero di KPCN.

Riba djaluna 12 di desèmber alredero di 12.44 or di mardugá un detenshon a tuma lugá riba Kaya Grandi. Durante un patruya general agentenan polisial a stòp un outo pa motibu ku esaki tabata manehá sin lus. Durante e kòntrol a resultá ku e shofùr di e outo tabata bou di influensia di alkohòl. A detené un hòMBER di 19 aña di edat di inisial J.C.V.D.M.

Djasabra 17 di desèmber alredero di 4.15 or di atardi un detenshon a tuma lugá riba Kaya Libertador Si-

mon Bolivar. Shofùr di un vehíkulo tabata manehá di manera sospechoso dilanti di warda di polis. Durante e kòntrol, e shofùr a resultá ta bou di influensia di alkohòl. A detené un hòMBER di 20 aña di edat di inisial L.G.R.T.


Den oranan di mardugá riba djaweps 22 di desèmber un detenshon a tuma lugá riba Kaya Caribe pa manehá bou di influensia i no kumpli ku instrukshon di polis. Agentenan polisial a para e shofùr di un vehíkulo pa motibu ku esaki tabata manehá di manera sospechoso.

Durante e kòntrol, agentenan a pidi pa mira e dokumentashon nesesario i e shofùr a ninga i bira verbalmente agresivo kontra polis. Despues di e echo, e shofùr a resistí kontra su aresto i agentenan a haña nan mes obligá pa detené e sospechoso hasiendo uso di forza fisiko. Kontrol adishonal a konstatá ku e shofùr tabata manehá bou di influensia di alkohòl. A detené un hòMBER di 41 aña di edat di inisial O.T.M.

Aksidente

Djaweps 15 di desèmber alredero di 10 or di anochi un aksidente a tuma lugá riba Kaya Hermandad. Shofùr di un outo a pèrdè kontrol di su outo i a terminá den un roi. Durante e kòntrol e shofùr a resultá ta bou di influensia di alkohòl. A detené un hòMBER di 39 aña di edat di inisial E.R.B.R.

Riba djasabra 10 di desèmber alredero di 4.30 or di atardi un aksidente a tuma lugá entre dos outo riba Kaya Korona. Na momentu ku polis a yega na e sitio nan a realisá un kòntrol ku a konstatá ku un die shofùrnan tabata manehá bou di influensia di alkohòl. A detené un homber



di 34 aña di edat di inisial Y.I.V.N.

Riba djaweps 8 di desèmber alredero di 8.15 or di anochi un aksidente entre dos outo a tuma lugá na Hanchi Amboina. Kòntrol despues di e aksidente a konstatá ku un di e shofùrnan tabata manehá bou di influensia di alkohòl.

A detené un hòMBER di 75 aña di edat di inisial I.O.W. pa manehá bou di influensia i a duna e shofùr un prohibi-shon di manehá pa 24 ora.

Djadumingu 4 di desèmber alredero di 8.40 di anochi un aksidente a tuma lugá entre dos outo riba Kaya Korona. Dos vehíkulo a dal frontal den otro. Un di e shofùrnan a keda heridá durante e aksidente i agentenan stabilis'é miéntras personal di ambulans a yega. Un analisis di rosea a demostrá ku e shofùr heridá tabata bou di influensia di alkohòl na momentu di e aksidente. A detené un hòMBER di 56 aña di edat di inisial D.K.G.K.

Djabièrnè 23 di desèmber alredero di 9.30 or di anochi un patruya di polis tabata manehá riba Kaminada Yato Bako den direkshon pa atendé ku un notifikashon ku a drenta sentral di polis, na momentu ku un outo a keda sin duna preferensia i a kousa un aksidente. E outo di polis a bin dal den e outo. Un kòntrol

pa investigá e motibu di e violashon di regla di tráfiiko a konstatá ku e shofùr tabata bou di influensia di alkohòl. A detené un hòMBER di 53 aña di edat di inisial R.J.G.C.

Riba djamars 27 di desèmber alredero di 08.42 di anochi un detenshon a tuma lugá na Hanchi Amboina. Despues di un aksidente entre dos vehíkulo, polis a realisá un kòntrol for di kual a resultá ku e shofùr tabata bou di influensia di alkohòl. A detené un hòMBER di 49 aña di edat ku inisial R.J.Z.V.

Riba un djadumingu alredero di 11.30 di anochi un aksidente a tuma lugá riba Kaya Nikiboko Sùit. Shofùr di un outo a kore dal den un kurá. E investigashon a indiká ku e shofùr tabata bou di influensia di alkohòl. A detené un hòMBER di 60 aña di edat di inisial A.D.M.C.

Riba djasabra 24 di desèmber alredero di 4.30 di anochi un aksidente a tuma lugá entre un pikòp i un outo di famia na Hanchi Amboina. Shofùr di e pikòp a pèrdè kontrol di su vehíkulo i a bin dal den e outo di famia. Ambulans a transportá e tres personanan den e outo di famia pa hospital pa tratamentu médiko. A detené e shofùr di e pikòp, un hòMBER di 39 aña di edat ku inisial A.E.T.T. pa manehá bou di influensia.

SOLUSHONNAN ESTATAL NOBO 16

NOS PROPIO ZONA EKONÓMIKO EKSKLUSIVO Loke nos no mester hasi

No ansha. No tin prueba ainda ku tin reservanan mineral eksplotabel den nos propio ZEE. Pues awor no tin sentido pa pleita over di esei entre nos islanan. i komo sea, e fronteranan ZEE entre Aruba, Kòrsou i Boneiru, ya a keda marká kaba (cf. e mapa). Pues sí ta deskubrí reservanan mineral den futuro, ta fásil pa determiná kua isla ta doño di nan.

Pues no ta prudente pa nos tres islanan reuní awor i yega na un akuerdo kiko nos lo hasi si mañan sí ta deskubrí reservanan? Bueno, Boneiru lo mester bira un Estado Federal Isleño promé. Pero kiko nos ta hasi despues?

Nos ta sugirí lo siguiente. Sí ta deskubrí reservanan den un di nos tres 'ZEE'-nan, nos ta palabrá for di awor ku kualkier invershon nesesario lo keda pagá dor di e 3 islanan huntu, kada isla kontribuyendo den proporshon di grandura di su poblashon. I ku entradanan neto ta bai na kada isla den mesun proporshon.

Anto e ora ei e pregunta ta: kende tin derecho di risibí e entradanan neto ei? E tres gobièrnunan? Dikon? Dikon no paga direktamente na tur siudadanonan adulto di e 3 islanan? After all, ken ta doño di e reservanan akí?

Nos ta bisa: e pueblo! Den un demokrasia gobièrnu t'ei pa sirbi pueblo, no al reves. Den un demokrasia serio e pueblo ta doño di tur tereno públiko i tur rekursanan. Pueblo ta paga gobièrnu pa ordená e sosiedat,



**Do not be like a Miser who saves
for those who will bury him.
(African Proverb)**


pa mantené pas i pa manehá tur tereno públiko i rekursanan pa pueblo. Pues e entradanan neto di e rekursanan akí mester bai na e pueblo. I ta hustu ku e pueblo tin ku paga un porsentahe razonabel di e entradanan akí na gobièrnu pa su trabou balioso. Nos ta proponé 10%. No mas, pasobra pueblo ta paga yen otro sorto di impuesto kaba.

E kontra argumento ku gobièrnu ta paga e invershon i ku p'esei e tin derecho di risibí e entrada-nan, ta nònsens. Pasobra gobièrnu ta finansiá e invershon, sea ku sèn di impuesto (ku pueblo a paga) òf ku fiansanan bankario (ku pueblo lo re-pagá ku impuesto òf e entradanan bruto di e ekstrakshon i eksplotashon di e rekursanan mineral). Pues e fli ei no ta subi.

Ta importante pa realisá ku ta hopi kostoso i difísil pa eksplotá rekursanan marítimo. Nos islanan no tin e konosementu ni e eksperensia den e ramo akí. P'esei nos ta puntra: lo no ta mas fásil i mas sabí pa nos hasi esaki huntu ku partnernan ku sí sa kon pa hasi'é?

Pues, dikon no djòin forsa ku Shell? Òf NAM? Òf otro kompania Hulandes ku tin eksperensia den e trabou akí? E islanan por invitá un di nan pa forma un konsorsio kuné. Dikon un kompania Hulandes? Bon, na promé lugá, dikon nò? Nos tur tres ta forma parti integral di Reino. Pero na di dos lugá, Hulanda tin forsa i ekspertisio internashonal. Hulanda lo defendé su propio i nos interesnan mihó ku kualkier kompania di afó.

Pero nos tambe tin ku tene kuenta ku Venezuela. Venezuela ta saka asina tantu entrada di su rekursanan natural, ku nan a bira hopi yalurs di nan. I ta komprendibel. Pasobra na 2015 Venezuela tabatin 30 mion di hende pa kuida.



Despues el a baha te na 28 mion, òf asta ménos, debí na emigrashon masal pa motibu di polítika imprudente. Pero e 28 mion ta basta miserabel awor akí. Nan mester di ayudo i nos mester di amigunan.

Pues nos mester buska amistad ku Venezuela. Komprondé nan situashon. No ta nesesario pa bai di akuerdo ku nan polítika, pero Venezolanonan ta keda nos bisiaña. Anto nos ta gana muchu mas sí nos ta dil ku bisiañanan amikal ku enemikal. Pues nos ta sugirí pa inkluí un kompania Venezolano den e konsorsio tambe. Kompartiando nos rikesa ku nos bisiaña, ta e mihó manera pa evitá pleitunan tokante nos derecho di eksplotashon.

Pues nos ta sugirí un konsorsio entre 1) e pueblo di Aruba, Kòrsou i Boneiru, 2) Hulanda i 3) Venezuela. Kada unu ta invertí 33.3% i lo risibí 33.3% di e entradanan neto. Un berdadero 'dream team', òf nò?

Modestia i amistad lo garantisá Pas i Prosperidat.

Loke nos no mester hasi, ta kue kentura di oro. Purba tene tur kos pa nos mes. Tende di tur sorto di 'peritonan' ku ta sali manera vruminga for di bou di kada piedra. Bira sosio ku algun kompania froudulento di BVI òf Panamá. I last but not least, tira un bon kantidat di korupshon lokal den e sòpi bruá akí. Esei ta loke nos no mester hasi.

Rincolanda kla pa fiestanan den 2023

KRALENDIJK -- Elba Mercera ta deseá tur fanátiko di Rincolanda un felis 2023 i ta partisipá na tur hende ku Rincolanda ta bai kuminsá ku su aktividatnan pa e aña akí. Ta bai tin e aktividat di kanto krioyo dia 21 di mei i 27 di mei selebrashon Dia di Rincon.

Bintisinku di yüni ta selebrá e fiesta di San Juan.

Tur aktividat organisá pa Rincolanda, ta tuma lugá na Hulanda. Rincolanda a mira lus di eksistensia na 2003, pues awor ta 20 aña di e fiestanan bon konosí na Boneiru, tambe organisá na Hulanda.

Tuma nota di e fechanan pa no perdè nada, pasobra ta hopi kos bon ta bai tin. Keda pendiente pa mas informashon i sí ta deseá, por tuma kontakto ku Mercera na 0628418936. Tambe por tuma kontakto kuné pa medio di Facebook, Elba, Mercera, Beaumont.



Di dos edishon ‘Siman di ròm’

KRALENDIJK -- E festival nobo di ròm ku mas tantu ambiente den region karibense ta bèk pa e di dos edishon na aña 2023, ku un siman yen di evento fantástiko di ròm i kulinario.

E siman di ròm di e aña akí, presentá pa Caribbean Journal, den kolaborashon ku Tourism Corporation Bonaire (TCB), ta dura di 12 pa 16 di yüni ku un programa kompleto di purbamentu di ròm, fiesta riba bich, seminario pa bartènder, sena den kombinashon ku ròm i vários kombinashon ku sigá.

Ta klousurá e evento dia 16 di yüni ku un agregashon nobo pa aña 2023, na momentu ku e popular ‘Taste of Bonaire’ uni forsa ku ‘Siman di Ròm’ pa un fiesta kulinario ku un toke di kaña den kurason di Playa.

“E promé edishon di siman di ròm tabata un éksito enorme i den 2023 e ta bira mas grandi i mas mihó,” segun Alexander Britell, redaktor i editor di Caribbean Journal, ku ta organisá Si-



man di Ròm, den kolaborashon ku TCB.

Nobo pa e aña akí ta tambe un kompetensia di kòktel ku ta kubri henter nos isla, kaminda bishitantenan i habitantenan lokal por purba kòktel den e mihó barnan di Boneiru i kaminda durante e siman nan por vota online pa nan favoritonan. Riba e último dia ta anunsia e mihó kòktel di Boneiru.

“Despues di un eksitoso

promé edishon, gustosamente huntu ku Caribbean Journal nos ta organisá e di dos edishon di ‘Siman di Ròm Boneiru,’” segun Miles Mercera, direktor di TCB. Durante e edishon akí nos ta spera ku mas partner ta djòin di manera ku e por bira un siman eksitante, kaminda nos poblashon lokal i nos bishitantenan por meskla ku otro, miéntranan ta eksperensia e esena kulinario di Boneiru.

E evento ta tira lus riba tantu e kultura floresiente di ròm i kòktel na Boneiru, komo riba e esena kulinario kandente, ku un kolekshon envidiabel di restorant, entre otro e restorant number unu den nos área karibense ku ta Brass Boer na Delfins Beach Resort.

“E evento akí ta tremendo i totalmente úniko,” segun Guy Britton, vise presidente ehekutivo i re-

daktor en hefe di Caribbean Journal.

E forma den kua ta organisá i manehá kada evento, ta representativo pa e spesialidatnan di kada hotel i kada restorant. E evento ta ofresé un selekshon hopi personal di e eksperensianan úniko di Boneiru.

Pa mas informashon bai riba Bonaire Rum Week, of manda un email na rum@caribjournal.com

Bishita di Maduro & Curiel’s Bank na Promé Beibi di aña 2023

KRALENDIJK -- Bonaire a konosé su promé beibi di aña ku a nase dia 4 di yanüari 2023 eksaktamente 00:31 di mainta i ku ta pisa 3790 Gram i midi 52 cm. Djarason 4 di yanüari Maduro & Curiel’s Bank, a bishita e promé beibi di aña.

Manera kustumber, MCB a opsekiá e beibi Ajmal Zahir Ishadai un bunita regalo. Lito huntu ku Lily-Ann Domacassé a bai hasi bishita i hasi entrega di e regalo na beibi Ajmal Zahir Ishadai den kompania di su mama Jazmin van de Werp-Rosario, tata Lisandro F. Janga, wela, enfermeranan Marit Deen, Jeamaliria Emerenciana i partera Geeske di Fundashon Mariadal.

Gerensia, staf i personal di Maduro & Curiel’s Bank (Bonaire) N.V. ta

felisita e mayornan i deseá famia van de Werp Rosario Janga hopi felisidat huntu ku nan beibi.

Foto ta mustra Lito ku e regalunan pa e prome beibi.



Brass BOER BONAIRE

Seri semi dokumental Sitionan Marká

Kueba Urizjan Blanku na Barcadera

KRALENDIJK -- E semi dokumental Sitionan Marká ku Frans Booi, ta un seri di 19 programa tokante sitionan históriko na Boneiru, presentá pa Felix Nicolaas. Dos siman pasá den wikènt i tambe siman pasá djabièrnè, a pasa den di 17 episodio Lagun. A tende di unda e nòmber ta bini, pa kiko e tabata sirbi e tempu aya. Na e entrada di e boka e laman brutu ta trahando otro lèter T, e importansia di pal'i mangel ku awendia ta birando ménos i hopi ta muriendo. Selebrashon místiko ku awa na un di e palunan mas grandi den e área i kiko ta un orákulo.

Boneiru tambe tin un den persona di Frans Booi, ku tin su bukinan ku orákulo skirbí. Tambe kiko tabata haña hopi na e bich di e playa di Lagun. E storia di e karta den bòter ku un mucha muhé ta haña.

Indjannan tabatin un bibá poko mas patras di e



palunan di mangel, un poko mas na haltu. Ta haña bunita bista alrededor di e bahia di Lagun i Booi ta splika tur e detayenan aserka.

Pa e wikènt akí ta haña otro tópiko interesante ku Frans Booi den e penúltimo

episodio ku ta number 18, Urizjan blanku. Pará na e obelisk promé ku yega na ofisina di STINAPA, frontera di Barcadera i Colombia, ántes kunuku di famia Hart, Booi ta splika e nifikashon di e nòmber uri-

zjan. Despues ta baha trapi i baha den e entrada di e kueba. Pa kiko tin un trapi di piedra den e kueba akí i na e pedestal ku tin trahá, Booi ta bisa ku e ta dediká na Parchita Alberto, ta haña sa ken e persona akí tabata.


Booi su amigu, Winfred Dania, tambe e ta papia un poko tokante di dje i relashoná ku e kueba akí, su simbolismo i e nòmber duná na e parti akí di su inspirashon.

Den e baki di awa un poko mas abou, ta haña Booi su storianan ku ta pas ku e lokalidat akí, den kueba, hendenan ku ta bai meditá na òf den kueba. Ta haña algun kansion pa terminá ku e episodio akí.

Hopi kos lo siña di Booi ku ta yuda nos pa ora nos bishitá e sitionan ku ta presentá den e programa Sitionan Marká.

Poko poko ta yegando na final di e seri. Danki pa boso reakshon riba di e programa ku ta pasando atra-bes di Bonaire.tv i despues riba YouTube den programan di FuHiKuBo.

Pues sufisiente motibu pa no pèrdè e seri Sitionan Marká e wikènt akí ya kasi na final di e seri. Kada dos siman ta pasa un episodio nobo, kuminsando djabièrnè 12 di mèrdia, ta ripití mei anochi, djasabra ta 4'or di atardi, djadumingu 8'or di anochi i djaluna 8'or di mainta.



Bunitesa di pal'i kuihi

KRALENDIJK – Na Aruba ta pone hopi atenshon na paisahe di e isla. Asina na hopi sitio por nota ku no ta kap palu di kuihi, pero ta snui nan. Un bunitesa di naturalesa.

Na Boneiru tempu ku Ben Oleana tabata direktor di SELIBON, el a bini ku un proyekto pa snui palu di kuihi en bes di kap nan. Te asta el a laga algun spe-

sialista di Aruba bin duna treinen na trahadónan di 'kapploeg'.

Pero pa un òf otro motibu e proyekto akí no a sigui. Ta preferá kap a palunan akí en bes di snui nan. Nan ta forma parti di naturalesa i momentu ku snui nan, e palunan akí tambe ta duna realse na naturalesa ku un bunita bista.



Dam Grandi yen di awa



Dam Grandi na Playa Grandi ta yen di awa. Huntu ku dam di Mona Pasashi, ta e dos damnan di mas grandi. Dam Grandi ta trahá mas o ménos 70 aña pasá. Funshon di dam i tanki ta importante, prinsipalmente pa evitá ku awa ta bai laman i pa drecha e awa bou di suela.

Bon trabou

A logra konservá e kas akí na Kaya Korona. Ta trata di un kas tradishonal, último habitá i ofisina di abogado Michiel Bijkerk. Ohalá mas hende por hasi esaki. Na hopi okashon ta nota ku ta basha e tipo di kasnan tradishonal akí abou en bes di restorá nan. Ta di kompromé ku e gastu pa restorá e tipo di kasnan akí ta haltu i ta preferá basha nan abou i konstruí nobo.

**Pa info i komunikado den
Extra/BONERIANO**

mail:

extrabon@gmail.com

Pa aviso mail:

avisobon@gmail.com



Kanta Orkidia a kumpli 50 año di eksistensia

*Resientemente Kanta Orkidia a kumpli 50 año di eksistensia. Konosí ántes pa nan konsiertonan di Pasku, tambe nan show di katibu. Nan a yega di graba dos CD, un ku kantikanan di katibu. Un di e fundadónan tabata Benita Balentin. E tabata dirigente tambe di e kor. Nan a res-
katá hopi kantika di ántes. Nan a entrevistá por ehèmpel, Buchi Angel Emers i Farrah Martijn-Piar pa a reskatá kantika i a graba nan. Nan no ta asina aktivo mas, pero ketu bai nan tei. Durante misa di ourora na Rincon nan a saka foto.*



DEN PASONAN DI BÒI

E rúbrika aki no ta kos di tur dia den BONERIANO. Ta ora mi tin tempu, gana i tópiko pa skirbi ariba e ta sali. E tres e-lementonan aki ta hunga un ròl den salimentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ritishon.

Mésun dia ku mi a pone mi reklamo den e kolumna aki tokante e problema ku kanal 67 di Flamingo TV nan a korigí e situashon. Mi kanal favorito riba kabel ta MeTV, kanal 67 di Flamingo TV. Riba e kanal aki nan ta pasa serinan di televishon di ántes, manera Dagnet, Bonanza, Highway Patrol, Perry Mason, Adam 12, The A-Team i hopi otro. Serinan ku ta pone mi rekordá mi tempu di infansia i hubentut. Danki Flamingo TV. Pero pakiko mester a tarda asina tantu? Kasi ún siman e kanal aki a keda di fris,

strobando ami i mas hende pa mira nan serinan favorito.

E siman aki Emma Pratt, lider di proyekto na FuHiKuBo, a informá mi ku nan a keda kla ku registrashon e bukinan antiano den nos kolekshon. Nos a yega na un total di 3.500 buki ku tin di aber ku historia, kultura i naturalesa. Ta trata di buki so. Nos a saka esnan dòbel i asta triplé afó. E rapòrt, estudio, manuskrito, revista i otro publikashonnan no ta inkluí. Ta e kolekshon di buki antiano mas grandi di islanan BES.



Bristol tabata un libreto hopi konsultá riba nos isla.

Masomé nos 40 aña pasá m'a kuminsá forma e kolekshon aki. Mi tabata kumpra bukinan ku sali riba e islanan aki. Despues di tempu hopi hende, ku sa di mi hòbi, a kuminsá ta regalá mi buki. Asina e kolekshon a krese i yega 3.500 buki, ku chèns ku ti mas ku ainda mi no a hiba FuHiKuBo.. Pronto nos lo bai informá e reglanan pa uso di e biblioteka aki. Pasobra t'esei ta e meta. Lo sali un komunikado di prensa tokante esaki.

Nicky Pietersz, pilá di FuHiKuBo, ta un persona persistente. El a buska i buska riba Internèt i a haña un vershon digital di Bristol 2023. Pa bonerianonan di ántes e buki di mas balioso, despues di Beibel, tabata Bristol. Pa ta mas presis, "Almanaque Pintoresco de Bristol", pasobra t'esei ta su nòmber ofisial. Pero su nòmber popular ta simplemente "Bristol" i m'a konosé e buki aki for di momentu ku mi a lanta komo mucha den añanan sinkuenta (e ta zona impreshonante) di siglo pasá.

Mi ta mensioná Beibel na promé lugá, pasobra e ta mas importante, e ta tur kos den nos bida, pero historia oral ta siña nos ku ta masha poko

hende na Boneiru tabata lesa Beibel te un sesenta aña pasá ainda. Te asta, segun bieunan ku mi a yega di kòmbersá kuné, pastornan katóliko tabata prohibí nan parokianonan pa lesa Beibel. E 'otro beibel' den kasnan na Boneiru ántes tabata pues Bristol. E buki aki sí no tabata 'menasá' pa pastornan katóliko. Tur hende por i tabatin tambe un Bristol den nan kas.

Tempu ku mi por a lesa, mi por a distinguí Bristolnan patrosiná entre otro pa e tiendanan Casa Roys di Ròrò i 'Aki mi ta' di Yaspu Provence. E tienda aki tabata keda nèt na e skina konosí aktualmente komo Kaya Papa Cornes-Kaya Korona. A basha e edifisio di tabla aki abou, pasobra un tal Bieu, ku tabata usa droga, a konbertí e edifisio di tabla aki den su domisilio. Mas bien por a

papia e tempu ei di 'Aki Bieu ta' i e doñonan a bai di akuerdo pa basha e edifisio d aki abou.

Bristol tabata un fuente di informashon sumamente importante pa nos bonerianonan di ántes. Pa piskadónan por ehèmpel tin te ainda den e buki aki e sekshon di 'Los mejores dias para la pesca', un konseho ku mi tata tabata sigui pertinenteamente ora ku e disidí di bai piska.

Bo ta haña den Bristol fecha di fiestanan religioso i posishonnan di luna.

Kunukeronan tabata sigui e último sekshon aki mashá djaserka, pa asina sa ki dia por a kap palu pa traha staka òf kinichi pa boto, sin ku esakinan ta putri despues.




Mi tata tabata pasa buska su Bristol tur aña na tienda 'Aki mi Ta' di Yaspu Provence.

MONCHI & TONCHI

Tonchi, krachinan lo ta kontentu. Boneiru a lanta kòrá kòrá djadumingu ei.

Awèl sí. Pero kòrá na suela i despues resultá na Landfill.



KOLOFÓN

Editor Bonaire
Communication
Services N.V.
Kaya Irlanda 12,
Tel. 717-8482

E-mail:
extrabon@gmail.com

Wèpsait:

www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta

Partner na Kòrsou
Extra

Hefe di redakshon
Nathaly
Evertsz-Ipcedencia

Layout
Davienuska Janga
Maya Beaumont

Redakshon
Papi Antoin
Davienuska Janga
Velli Gijsbertha
Edson Pietersz
Ibi Piar (deporte)

Konsehero:
Bòi Antoin
786-6818

Aviso
avisobon@gmail.com

Dikon no kere den superstishonnan di Aña Nobo?

Pa Yhonatan Luque Reyes | ACI Prensa

Superstishonnan di Aña Nobo ta praktikanan bastante ekstendé entre personanan ku ta buska na mehora nan futuro poniendo nan speransa den aktividatnan manera sali kore ku maleta, komo 12 drüif òf bisti prendanan koló hel.

Sin embargo, Iglesia Katólíko ta siña ku tur tipo di superstishon ta kontrario na e fe kristian.

Esakinan ta algun rason pa no kere den superstishonnan di Aña Nobo.

Superstishon ta un piká kontra e promé mandamentu

Den number 2110 di Katisashi di Iglesia Katólíko ta señalá ku e promé mandamentu ta prohibí superstishon,

lokual ta “representá den sierto manera un korupshon, pa ekseso, di religion”.

Katisashi ta indiká ku superstishon tambe por afektá e kulto ku nos ta duna na e berdadero Dios “ora nos ta atribuí un importansia, di algun moda, mágiko na sierto praktikanan”.

Ademas, Katisashi tambe ta advertí ku superstishon, na ta un desviashon di e kulto ku nos mester duna na e berdadero Dios, “ta kondusí na idolatria i na distinto forma di miramentu di destino i di magia”.

Ta pesei, mester rechasá e praktikanan “mágiko” akí òf suposishonnan di Aña Nobo ku ta buska na alterá futuro

ku e fin di haña plaka, biahenan òf suerte grandi den amor.

Santunan a kondená tur tipo di superstishon

Santo Tomás de Aquino a laga nota den su Suma Teológi-ko ku den tur akto superstisioso “tin sierto intervenshon di demoñonan”.

E Doktor di Iglesia a splika ku pidimentu di yudansa di demoñonan pa realisá òf konosé algun kos ta superstishon.

Di su parti, San Agustín a siña ku “kristiannan mester rechasá i hui di tur arte notorio komo tambe di otro praktikanan superfisial i dañino di superstishon”.

Ademas, el a kritiká “e esfuersonan inútil di artenan mágiko, talisman i remedinan ku medisina ordinario ta kondená, ya ku ta trata di enkantamentu, di sierto sifra, ku nan ta yama karakternan, òf di kualke di e ophetonan ku nan ta kana kuné kologá òf mara”.

San Pablo a rechasá superstishon

Tambe Beibel ta konta un episodio den kua San Pablo a skual un muhé pa kousa di su superstishon.



Den kapitulo 16 di e buki di *Echonan di Apòstelnan* ta konta ku un muhé katibu tabata pronunsiá orákulo pa wak destino di futuro i laga su doñonan gana plaka.

San Pablo a ripara ku e muhé tabata komportá su mes di e manera akí pasobra e tabata poseé pa algun demoño, asina ku, den nòmber di Hesus, el a ordená e spiritunan pa bandoná kurpa di e muhé katibu.

E doñonan di e muhé a komprendé ku ya nan no por a sigui ganando plaka i a manda na suta San Pablo i ser’ é den prizòn.

Ta mihó kere den e providensia di Dios

Superstishonnan di Aña Nobo ta provoká ku personan-

an ta stòp di konfia den e providensia di Dios pa pone nan fe den akshonnan apsurdo i superfluo.

En kambio, kristiannan mester rekordá e pasashi akí di Evangelio ku ta siña nos Dios pa sòru pa nesesidatnan di nan yunan.

“P’esei no preokupá i puntra: “Kiko nos ta kome? Kiko nos ta bebe? Kiko nos ta bisti?” Pasobra ta e paganonan ta kore tras di tur e kosnan akí. Boso Tata den shelu sa ku boso tin mester di tur e kosnan akí. Buska reino di Dios i buska pa hasi su boluntad promé i boso ta haña tur e sobrá kosnan akí aserka” (Mt 6,31-33).



Dios ta Amor: Kon nos ta definí Amor?

“Dios ta Amor”. Pero kon nos por definí esaki? Dikshonario ta definí amor komo “un afekto intenso” pa un otro persona, basá riba lasonan familiar òf personal”. Normalmente, e “afekto intenso” tin su rais den un atrakshon seksual pa otro persona. Nos ta stima otro hende òf nos ta bisa di stima otro personanan, ora nos ta atraé na nan òf ora nan ta pone nos sinti bon. Ripará ku e frase klave den e definishon di amor ku ta pará den e dikshonario, ta e frase basá riba”. E frase ei ta impliká ku nos ta stima na un manera kondishonal, ku otro palabra nos ta stima un persona pasobra e ta kumpli ku nos. E ke/ta deseá promé ku nos por stima nan. Kuantu ta e biahanan ku nos a skucha e dicho: “Mi ta stimabo pasobra bo ta bunita, òf mi ta stimabo pasobra bo ta kuidá mi, Mi ta stimá bo pasobra mi por diberti ku bo?”

Nos amor no solamente sa ta kondishonal, hopi biaha e ta basa su mes riba sentimentunan i emoshonnan ku por

kambia di un momentu pa otro. E kantidat di diborsio ta ekstremadamente haltu den e sosiedat aktual, pasobra esoso i esposanan supuestamente ta stòp di stima otro. Por ta ku nan ta eksperenshá kualkier bashí òf estorbo den nan matrimonio i ya p’esei no ta “sinti” uní mas, di moda ku nan ta duna nan mes komo vensí. Evidentemente, nan voto matrimonial di “te ora ku morto separá nos”, pa nan ta nifiká ku nan por separá ora ku nan no sinti nada mas pa otro, pues ora ku e amor muri na lugá ku ora nan muri físicamente.

Un hende realmente por komprendé amor “inkondishonal”? Ta parse ku e amor ku mayoman tin pa nan yunan ta mas serka ku nos por mira di un amor inkondishonal, sin e yudansa di e amor di Dios di nos bida. Nos ta sigui stima nos yunan atraves di bon i mal tempu, i nos no ta stòp di stima nan, ni maske ku nan no kumpli ku e ekspektativanan ku nos tin di nan. Nos ta tuma e desishon di stima nos yunan,

ni maske nos ta haña ku nan no meresé e amor nos no ta laga nan kai, nos amor no ta para ora ku nos no sinti amor pa nan. E amor ei ta similar na e amor di Dios ku semper ta sigui stima i tin amor pa nos. Pero kon nos ta mir’ é. E amor di Dios ta trasendé e definishon humano di amor na punto ku ta difisil pa nos komprendé.

Dios ta Amor: Kon Dios ta definí Amor?

Beibel ta bisa nos ku “Dios ta Amor” (1 Huan 4:8). Pero kon nos por sikiera kuminsá komprendé e bèrdad ei? Tin hopi pasashi den Beibel ku ta duna nos e definishon di e Dios di amor. E versikulo ku ta mas konosí ta esun di Huan 3:16: “Pasobra asina tantu Dios a stima mundu, ku El a duna su úniko Yu, pa tur ku kere den djE no bai pèrdí, sino ta haña bida eterno”. Di e manera aki pues, Dios ta definí su amor den e akto di entrega. Sin embargo, lokual ku Dios a duna (òf kisas nos mester bisa, na “ken” Dios a duna), no tabata solamente un opsekio bunita paketá; Dios a

sakrifiká su úniko Yu p’asina nos, nos ku ta pone nos fe den su Yu, lo no pasa un eternidat separá di djE. Esei ta un amor asombroso, pasobra nos ta esnan ku ta skohe di ta separá di Dios, pa via di nos mes piká, i hasta di e forma ei, Dios ta Esun ku tin klemensia p’ e separashon aki pa medio di su inmenso sakrifisio personal, i tur lokual ku nos mester hasi ta aseptá su opsekio.

Otro gran versikulo riba e amor di Dios nos ta haña den Romanonan 5:8: “Dios sí ta demostrá su amor pa nos dor di Kristu a muri pa nos miéntras nos tabata pekador ainda.” Den e versikulo aki i den Huan 3:16, nos no ta topa ku ningun kondishon di kua e amor di Dios ta dependé di nos mes. Dios no ta bisa: Ora bo limpia bo akshonnan, mi lo stimabo, ni tampoko E ta bisa: “Mi ta sakrifiká mi Yu si bo ta primintí ku bo ta stimami. Hecho ta ku den Romanonan 5:8 nos ta topa eksaktamente lo kontrali. Dios ke pa nos sa di su amor i ku esaki ta inkondishonal; ta p’esei El a manda su yu, Kristu

Hesus, pa muri pa nos, miéntras ku nos tabata pekadornan ainda. Nos no tabatin nodi di limpia nos mes, nos no mester a hasi ningun promesa na Dios promé ku nos por a eksperimentá su amor. Su amor pa nos semper a eksistí i pa medio di esaki, El a entregá tur kos i a sakrifiká tur kos hopi promé ku nos tabata konsiente ku nos tabatin mester di su amor.

Dios ta Amor: Esaki ta inkondishonal.

Dios ta Amor, i su amor ta hopi diferente for di e amor humano. E amor di Dios ta inkondishonal i no ta basa su mes riba sentimentu òf emoshon. E no ta stima nos pasobra nos ta fásil pa stima òf ku nos ta pon’ é sinti bon, E ta stima nos pasobra E ta amor. El a krea nos pa E tin un relashon amoroso kuné i a sakrifiká su mes Yu (kende tambe tabata dispuesto pa muri pa nos) p’asina restourá e relashon akí.

STATIA/SABA/ST. MAARTEN

Mensahe di aña nobo di Minister Samuel

PHILIPSBURG – Minister di edukashon, kultura, hubentut i deporte, Drs. Rodolphe Samuel, den su mensahe di aña nobo ta ekstendé su deseo pa un aña próspero, salú, seif i kontentu pa tur hende ku nan ta yama St. Maarten nan kas. Un aña nobo ta tempu pa reflekshoná riba e aña ku a kaba terminá i pa hasi resolushon riba metanan pa kumpli ku nan durante e aña akí.

Tin biá nos ta hasi e resolushonnan akí ku bon intenshon, pero tin biá huntu ku e liña, pa resolvé nos debilidatnan momentu ku e aña ta progresá. “Laga mi kurashá tur hende e aña akí pa tuma tempu pa pensa kiko nan ke logra i pone un plan di trabou pa poné bo mas pegá ku bo meta momentu ku e aña ta progresá.”

Pa mayornan en partikular, Minister Samuel ta



kurashá pa hasi resolushon pa kita nan yunan for di telefòn anochi na e momen-

tu rasonabel.

Esaki lo kondusí nan na un sosiegu bon i opservá nan pa kapta e informashon proveé pa nan dosente e dia siguiente.

Edukashon ta e mihó regalo ku bo por duna bo yu, komo parti di esaki pa sigurá nan pa ta bon deskanzá i no kansá pa hasi avanse di e oportunidat ku a duna nan. “Tambe mi ta urgi nos studiantenan pa hasi un resolushon pa dediká mas

tempu na studia i ménos tempu riba nan aparatonan elektróniko anochi. Esaki lo kondusí na éksito.”

E aña ku a pasa nos atletanan a logra hopi éksito ku algun logro hopi impreshonante. Tuma e aña akí pa hasi mas deporte. Deporte por proveé un hóben, spesialmente ku e sentido di bon salú físiko i mental i nos mester kurashá mas i mas hubentut pa ta enbolbí den deporte.

Komisario Alida Francis den mensahe di aña nobo

Aña 2023 ta yega ku speransa i inspirashon nobo

ORANJESTAD (EUX) – “Ta parse ku tabata ayera ku mi a kompartí ku boso e mensahe di optimismo i primintimentu pa 2022, biniendo despues di un aña hopi malu. Awor tempu ta bula i nos ta drentando un aña di kambio. Aña 2023 ta yega ku speransanan i aspirashonnan nobo, soñonan i espektativanan nobo, am-

bishonnan nobo i resolushon,” Komisario di Gobièrnu di St. Eustatius, Alida Francis, a trese dilanti den su diskurso di aña nobo.

Momentu ku nos ta antisipá e primintimentu pa un aña nobo, e mester rekordá nos pa no selebrá nos logronan i kompromisonan na 2022. No kiboká tokante esaki, 2022 tabata

un aña di reto, ku e kosto di bida siguiendo oumentando i asuntunan di bibienda i kuido salú ketu bai di preokupashon. Miéntras nos mester ta kuidadoso pa no supestimá e difikultatnan grandi ku nos ta konfrontá, segun Francis.

Francis ta sigui, apesar di tur e opstákulonnan ku nos a konfrontá, nunca nos a entregá, tampoko falta ku nos kumplimentu pa konstruí un Statia den kua tur residente tin un posishon igual.

Francis: “Mi ta aploudí e esfuersonan ku nos ta hasi

pa yuda krea un futuro di prosperidat bunita pa nos mes i pa nos isla. Apesar di tur kos, éksito ta nifiká poko di loke nos tur ta parti di un produkto di dje. Pa e motibu ei mi ta invitá tur residente di Statia pa djòin mi pa selebrá e echo ku nos a hasi un paso grandi pa dilanti, pa e regreso kompleto di nos demokrasia, ku e mediashon ku a resultá den nos hasiendo progreso signifkante den e echo ku a apuntá dos komisario i e firmamentu di un akuerdo ku Hulanda riba e progresonan importante manera reduk-

shon di pobresa, bibienda sosial, agrikultura sostenibel, desaroyo ekonómiko, refsorsá e netwerk di telekomunikashon i mas. Tambe nos a risibí un supsidio pa energia pa esnan mas vulnerabel.”

Laga nos brinda riba e éksitonan manera kuminisamentu di fase unu di Airport Boulevard, Gwendoline van Putten School nobo i renobashon di bibienda sosial. Hopi mas logro por haña bèk den e resúmen di aña di Gobièrnu di Statia su página Facebook i kanal di YouTube, Francis a bisa.




Oumento penshun di behes ku forsa retroaktivo

PHILIPSBURG – Entrante promé di yanüari 2023 penshun di behes ta subi di 1240 florin pa 1338 florin. Penshun di vuida i huérfano tambe ta subi.

E indeksashon pa 2023 ta basá riba e preis indekse di konsumidó, CPI, di e segundo kuartal di 2021, 2.84% i e segundo kuartal di 2022, 4.91%, pa yega na e kalkulashon.

E ofisina di seguro sosial i salú, SZV, lo paga e montante oumentá di akuerdo ku nan prose-



duranan interno.

Minister di salubridat públiko, desaroyo sosial i labor, Omar Ottley, a indiká ku e petishon pa oumentá e penshunnan ya a keda aprobá pa Konseho di Minister i mandá SER i

COA pa aprobashon, pero desafortunadamente a topa ku e konflikto entre e lei i e situashon aktual. Aktualmente mester usa e legalisashon ku ta rekerí indeksashon di penshun di behes di e CPI di ougùstùs.

Na e momentu akí St. Maarten i Hulanda solamente ta kalkulá e CPI pa kuartal. Di akuerdo ku SER, COA i Gobernador, tur legalisashon modifiká mester ta akordá promé ku e oumento por tuma lugá.

HOH a atende mas pashent cu den tempo di COVID

ORANJESTAD -- Anualmente Horacio Oduber Hospital ta haci un analisis di esnan cu acudi na Departamento di Emergencia e dianan prome, durante y despues di cambio di año. HOH kier na prome instante gradici full e team cu a traha incansablemente durante e weekend di fiesta. Un fin di siman unda cada empleado a traha duro pa asina atende tur pashent cu a yega cu un of otro problema medico.

E analisis a cuminsa dia 30 di december 2022 pa

6pm y a termina dia 2 di januari 2023 pa 6am. E cantidad di persona total cu a acudi pa sea ricibi atencion medico na Departamento di Emergencia of dokter na warda tabata 361. Año pasa ainda Aruba tabata den e gara di Covid y e cantidad di pashent tabata un poco menos, esta 326 y na año 2020 hasta 262. E año aki a atende 3 victima di vuurwerk. Año pasa tabata ningun caso cu ta algo remarcabel y e na 2020-2021 tabatin 2 caso di vuurwerk.

Di e 361 persona un to-

tal di 152 a ricibi atencion medico na Departamento di Emergencia cual 54% ta masculino. E edad di mas abou cu tabatin mester di atencion na departamento di emergencia ta un baby di 3 luna y e pashent di mas grandi tabatin 94 año.

Edad averahe di e grupo cu a acudi tabata 48,7 año. Edad cu mas a acudi Departamento di Emergencia ta entre 19 cu 65 año. Ta interesante tambe pa analisa e motibo di bishita durante e fin di siman di di fin di año. Di e 152 pashentnan cu a

acudi na Departamento di Emergencia 68 tabatin herida/lesion: 12 tabata involucra den un accident di trafico, 7 persona den incidente di violencia, 3 pa motibo di vuurwerk y 46 pa motibo di por ehempel caidan, verzwik enkel, corta etc.

E otro 84 casonan tabata pa motibonan otro cu no tin di haber cu traumanan fisico manera por ehempel intoxicacion, dolor na pecho, dolor di stoma, sacamento, un of otro infeccion, reac-

cion alergico etc. Di e 152 pashentnan cu a acudi na Departamento di Emergencia un total di 45 pashent a ser admiti den Hospital. Alabes mester bisa tambe cu 60% di pashent admiti ta masculino. Edad averahe tabata 51,6 año. Team completo di Hospital kier desea henter comunidad un feliz año 2023 yena cu amor, prosperidad y salud! Y si encaso bo mester di asistencia medico corda tambe cu nos di HOH semper t'ey!

Sjeidy Dijkhoff Feliciano Directora di Norte America di Oficina di Turismo

ORANJESTAD -- Aruba Tourism Authority kier anuncia oficialmente e promocion di Sjeidy Dijkhoff Feliciano como A.T.A. su Directora di Norte America. Den luna di juli 2022 Sjeidy a cumpli 20 año na A.T.A. unda e a fungi den diferente rol y tawata encarga cu diferente proyecto importante incluyendo e Aruba Certification Program cu a wordo lansa na

2011.

Durante e ultimo 11 añanan Sjeidy tawata e Communications Manager na A.T.A., encarga cu e aspecto di relacionnan publico pa Aruba y 'influencer marketing' den 10 diferente mercado internacional cu e proposito principal di promove Aruba como destino turístico.

Durante e pandemia Sjeidy tawata encarga cu

Aruba su strategia di comunicacion di crisis riba nivel global, un responsabilidad grandi cu e a sa di carga, sigui pa e strategia di comunicacion di reapertura, proceduranan di salud y seguridad como tambe e rekisitonan pa bishitanenan.

Den su posicion nobo Sjeidy lo traha di cerca cu tour operadornan y socionan di e mercado Norte Americano, y lo keda basa na Aruba. Esaki ta permiti cu e por mantene relacionnan estrecho cu socionan na Aruba tambe y asina traha riba strategianan beneficoso pa cu e necesidadnan di cada socio.

E conocimiento di turismo y e relacionnan cu Sjeidy a logra establece den su añanan na A.T.A. sigur lo contribui na desaroyonan positivo pa cu e mercado di mas grandi pa Aruba. Como organizacion e ta sigur un placer y orguyo cu e posicion aki ta parti di un promocion interno unda un miembro di ekipo ta haya e oportunidad pa ta e directora di e mercado principal di Aruba.



Europa y Merca ta habri e porta un tiki cu Venezuela

ORANJESTAD -- Aruba te ainda no a duna indicacion cu ta cla pa habri sea frontera maritimo of aereo cu Venezuela. Esaki mientras islanan ruman si ta practicamente dicidido pa habri frontera. Di otro banda Merca como Europa ya caba a cuminsa suavisa e relacion cu pais bisiaña Venezuela. For di Europa a yega e prome crucero den 15 año. Un crucero cu lo bishita Aruba tambe.

Di otro banda, un tanker cu petroli Venezolano a sali rumbo pa Merca. For di e refineria Venezolano Bajo Grande na estado Zulia, Venezuela a cuminsa carga 250.000 bari di petroli pisa tipo Boscan pa asphalt pa exportacion pa Merca awor cu gobierno Mericano a suavisa e reglanan cu tabata prohibi companianan petrolero refina petroli Venezolano. Esaki te prome exportacion di petroli for di 2018 for di Venezuela directamente pa Merca despues cu Merca a tuma sancion fuerte contra Venezuela

como castigo pa e eleccionnan corrupto cu a bin ta tuma luga bou di e regimen Chavista den e pais.

E tanker Beauty One a caba di abastecer y ta nabegando rumbo pa un refineria na Merca como resultado dje operacion combina entre PDVSA y Chevron. Petroboscan di Chevron ta produci 10.000 bari di petroli pa dia y ta un refineria bieu cu nan a construi na 1993.

Beauty One ta un dje tres tankernan cu a bin carga petroli y asphalt y nafta Venezolano. E proximo lo te ta petroli Merey 16 cu nan lo carga ne terminal di José na oost di Venezuela.

Djaluna a yega Margarita e prome crucero Europeo den 15 año. El a drenta na haf El Guamache, isla di Margarita, y ta trata di e crucero Amadea. E ta un barco Aleman riba cual ta biaha turistanan precedente di Spaña, Alemania, Belgica, Francia y Italia. E barco aki despues lo pasa Boneiro y Aruba.

ARUBA

Droga haya den Nissan Murano y a detene tres persona

ORANJESTAD -- Riba aña nobo un patruya coriendo riba e caminda di Palm Beach a descubri debi na nan bon olfato droga den un auto marca Nissan Murano y a bay cu tres persona Warda di Polis. E hecho aki a sosode dia prome di januari 11.30 di anochi.

E patruya tabata riba caminda di Palm Beach,

den area di un restaurant conoci, ora cu a haya holo di marihuana cu tabata bini for di e auto coriendo nan dilanti. Mesora a duna e chauffeur señal pa e para e vehiculo.

E holo di marihuana a bira mas fuerte ora cu e polisnan tabata cana pa yega direccion di e auto. Den e vehiculo tabatin tres perso-

na masculino. E chauffeur ta di inicial H. Na momento cu tabata combersa cu ne, a mira, via di e bentana robes cu tabata habri, un pochi transparente cu yerba parecido na marihuana. E pochi aki tabata riba e tapijt banda robes (parti patras di e auto). Mesora a sospecha cu nan a viola ley di droga.

A pidi e chauffeur per-

miso pa controla den e vehiculo. Asina a bin descubri e pochi na suela den e auto. Tambe a haya un saco di plastic cu algun pildo cora. Tambe a topa cu dos balans riba e asiento patras. Na banda robes dilanti den e auto, na e banda di e ocupante tabatin dos tas. Den e tasnan tambe a haya tubo of pochi cu yerba parecido na marihuana y otro ba-

lansa mas. Den e heuptas a haya dollar y biyetenan di florin. Den man di e porta banda drechi (e banda di e chauffeur), a haya un saco di plastic color ros cu tambe tabata contene marihuana. A base di tur loke cu a haya den e auto, a detene e hombernan H., R. y K. E auto a cere completamente na lock y a lague para banda di caminda.

Mas uni nos ta, mas fuerte Aruba ta.

Ban uni pa enfrenta e retonan hunto y pa carga e exito hunto

ORANJESTAD - Gabinete Wever-Croes II ta yama bon bini na aña 2023 yena cu hopi optimismo y oportunidadnan nobo, pa crea progreso y bienestar pa tur ciudadano. Un aña cu lo enfoca na atrae inversionnan nobo, pa diversifica di nos economia, specialmente riba tereno di energia, pa asina hunto cu e pilar di turismo, brinda Aruba e estabilidad necesario pa no solamente 'bounce back' di e crisisnan, pero pa 'bounce forward', pa recupera mas fuerte y resiliente.

Prome Minister Evelyn Wever-Croes ta invita cada ciudadano di Aruba pa den aña 2023 uni pa enfrenta retonan hunto y pa carga e exito hunto. Historia di nos pais a demostra con mas fuerte nos por ta si nos uni. Diferencia di opinion por tey, contal cu semper tin respet. Y irespetto e diferencia di opinion, ora ta trata di Aruba, mas uni nos ta, mas fuerte Aruba ta. Aña 2023 lo trece hopi cambio pa cada un di nos, y nan impacto riba cada un di nos lo ta fuerte. Sinembar-

go e cambionan aki tambe lo trece cosnan bon pa nos entre otro progreso y bienestar cu nos ciudadanonan merece.

Aruba ta un pais bendicida, y cu fe den Dios, mester ta positivismo cu tin cosnan grandi nos dilanti. Den union y positivismo nos lo supera e retonan cu crusa nos caminda den 2023, pa diversifica nos economia, pa transiciona pa energia mas limpi. Esaki lo crea cupo di empleo, y lo crea un base financiero solido cu lo permiti Aruba haci inversionnan atrobe den nos infraestructura, dirigi riba desaroyo sostenibel, cu respet pa nos medio ambiente.

Den union nos lo mehora e calidad di cuido, y eleva e nivel di nos enseñansa.

Den union nos lo haci Aruba mas sigur, y brinda apoyo na tur cu mester di dje.

Y tur esaki cu un actitud positivo, cu ta permiti nos mira e solucion pa cada reto y oportunidad nobo den

cada situacion. Pesey Gobierno di Aruba ta decreta aña 2023 como aña di union y positivismo. Uni nos lo atende cu e retonan nobo creando solucion, oportunidad y un base solido pa progreso y felicidad pa un y tur den nos comunidad.

Pa conclui, Prome Minister Wever-Croes ta expresa e siguiente mensahe cual ta un frase di e actual presidente di Ucrania Volodimir Zelensky; el a bisa recientemente: 'Carga responsabilidad ta mas importante cu trata di ta un heroe.' Premier Wever-

Croes ta di pensamiento cu cargando responsabilidad, bo por bira un heroe, pero si bo no carga bo responsabilidad, bo no po bira un heroe. Nos cada un tin un responsabilidad di carga pa hiba nos famia y nos pais padilanti, algun tin un responsabilidad mas grandi cu otro. Pero hecho ta cu nos tur mester carga nos responsabilidad. 'Ban sigui carga nos responsabilidad pa un Aruba integro. Mi ta invitabo pa den union y cu Positivismo, nos carga nos responsabilidad,' Prome Minister a termina bisando.

EXECUTIEVERKOOP

Op vrijdag 6 januari 2023, om 10:00 uur, vindt een openbaar verkoop plaats.

Te koop wordt aangeboden:

Lexus IS 250 bouwjaar 2008 en Nissan X-Trial

De zaken zijn 30 minuten vóór de verkoop voor één ieder te bezichtigen.

Betaling via bankoverschrijving of bij het postkantoor (zonder opgeld).

De verkoop, in opdracht van de Ontvanger van Belastingdienst Caribisch Nederland vindt plaats op het adres: **Kaya Gurupi 10A Tera Cora.**

Belastingdeurwaarder belast met de executie Sedney Sint Jago



Grip di para ta afektá mamífero tambe

Rísiko pa hende

HULANDA – E vírus di grip di para ku ta zuai rònt mundialmente, ta afektá mamífero tambe. Esaki a sali na kla for di sifranan nobo ku Trouw a mira. Na Hulanda e último un año i mei diferente mamífero a keda afektá ku e vírus. Se-

gun Thijs Kuiken, virólogo na Erasmus Medisch Centrum, esaki ta e tòp riba e seru di eis.

Ku e vírus di e grip di para ta tras pasá di para pa mamífero ta preokupante, pasobra esaki ta nifiká ku hende tambe por keda kon-

tagiá. “Riba término esaki por ta un rísiko pa hende,” Kuiken ta splika na NPO Radio 1. Den mamífero e variante por desaroyá su mes kaminda hende ta vulnerabel.

E vírus di para ku awor ta bai rònt ta difísil pa tené bou di kontròl, pasobra mundialmente grupo grandi di para ta kontagiá kuné. Originalmente e vírus a kuminsá den e industria di bestia di pluma doméstiko, segun Kuiken. Mamífero nan ta resultá kontagiá komo ku nan ta kome para

kontagiá.

“Hende no ta resultá kontagiá dor di kome bestia kontagiá, pero komo ku nan ta bini den kontakto ku para kontagiá,” segun Kuiken. E ta agregá ku na Europa esaki ta bini ménos dilanti ku por ehèmpel na China, kaminda ta bende galiña bibu riba marshe i matá na e sitio. Dor di esaki ta bini kontagio.

Kuiken ta pensa ku mamífero di kua awor ta konosí ku nan ta kontagiá ku e grip di para, ta solamente e e tòp di e seru di

eis. E sifranan ta demostrá en todo kaso ku e kantidat grandi di mamífero ta vulnerabel i ku kontagio ta bini dilanti regularmente.

Bakunashon di para di pluma doméstiko ta un manera pa evitá plamamentu mas aleu. Na Europa ta hasiendo trámite pa kuminsá ku bakuna i na otro sitionan ya esaki ta sosodiendo. Ku esaki e chèns ku e vírus ta resultá serka hende ta bira mas chikitu.

Ainda no tin un bakuna kontra grip di para pa hende.



Oumentu kantidat aksidente ku morto

HULANDA – E kantidat di aksidente di tráfiiko ku morto a oumentá e año ku a pasa konsiderablemente. Segun sifranan tentativo di Smart Traffic Accident Reporting (STAR), año pasá tabatin 578 aksidente di tráfiiko ku por lo ménos un morto. Na 2021 esaki tabata 491.

Ta trata di aksidentenan ku polis ta registrá. E kantidat i morto ta haltu, pasobra den e sifranan di STAR ak-

sidente kaminda mas morto kai ta konta komo unu. Aparte di esei, STAR no ta registrá tur aksidente ku morto. Sí un siklista muri despues den hospital sin ku enbolbí polis, esaki no ta bini den e sifranan.

Te dia 19 di mart numa Ofisina Sentral di Statistik ta publiká kuantu morto di tráfiiko a kai año pasá. Tòg e sifranan di STAR ta bolbe duna un tendensia. E kantidat di aksidente a baha pa

hopi año, pero a kuminsá bini un cambio den esaki, Paul Broer, di polis di tráfiiko nashonal ta bisa.

“Esaki ya nos a mira ta bini fin di año pasá. Na 2020 tabatin un bahada grandi, pero esaki a bini dor di e medidanan di Corona dor di kua tabatin ménos tráfiiko riba kaya,” Broer ta bisa den NOS Radio 1 Journaal. E oumento di fin di año 2021 a kontinuá na 2022.



Aglomerashon prohibí pa evitá violensia

DEN HAAG – Den dos barío den Escamp na Den Haag, e dianan ku ta bini no por aglomerá den grupo. Siman pasá djamars a hinka un hóben di 15 año den un tienda di barío. Pa esaki a detené un muhé di 32 año i tres menor di edat. Tokante e motibu no ta konosí.

E último dianan tabata intrankil riba kaya i nochi di kompra. P’esei tin un prohibishon por lo pronto

pa mas ku dos persona ta huntu.

Munisipio Den Haag ta laga Omroep West sa ku un prohibishon di aglomerashon ta un medio intervension, pero sí awor algu mester sosodé, pasobra ta eksistí peliger serio pa violensia nobo momentu ku gruponan bini huntu.

E prohibishon di aglomerashon ta bálido en todo kaso ta ku djabièrnè.





Guia di Hortikultura

Berehein (*Solanum macrocarpon*)

Famia: SOLANACEAE
Sinónimo (otro nòmber): Aubergine, Egg plant.

Orígen i karakterístikanan general

E ta originá na India. E ta un mata ku mester di tera ku bon dre-nahe, esta tera ku no ta keda muhá. No mester plant'é den tera será ku hopi klei. Berehein ta un mata adaptá na klima kalor, na Kòrsou e por krese hasta den e tempu mas kalor di aña. Por plant'é durante henter aña. E ta rekerí, 0,5- 0,8 m³ di awa pa dia pa 100 m². No planta direktamente mes kaminda ku a planta otro kultivo di mata ku ta pertenesé na e mésun famia, esta famia di SOLANACEAE (por ehèmpel promèntòn, tomati, promèntè pika). E mata tin flor di dos sekso den un flor so, kada flor por bira fruta.

Variedatnan ku ta duna bon resultado na Kòrsou

* Baluroi - Baluroi no ta marga i e kosecha ta kuminsá mas trempan, e frutanan ta largu * Classic * Barbentana * Black beauty - e frutanan ta rondó * Pingtung long (Known-you seed i otro kompanianan tambe): e fruta ta largu, su koló ta püs skur i e karni ta blanku * Vittoria - e frutanan ta largu * Long purple (Petoseed)

Sembramentu: 1 gram di simia ta kontené 150 te 200 simia. Si bo ta sembra awe, bo por spera bo promé kosecha despues di 11 siman. Si bo ke tin kosecha kontínuo di berehein, bo tin ku sembra kada 20 siman.

Transplantá: Transplantá ora e planchinan tin un altura di 6-7 cm. Saka e planchinan for di e simiero. Por pone nan den solo algun dia promé ku transplantá, pa nan kustumbra ku forsa di solo. Muha e tera un dia promé. Transplantá mainta tempran òf despues di 5 or di atardi. Tene tera di e planchinan den e Jiffy muhá òf pòchi ku tera muhá te na momentu di transplantá. Planta e klòmpi ku raisnan mas o ménos 1 cm bou di tera, primi e tera sera levemente. Muha direktamente despues di a transplantá.

Sistema di irigashon

No pone e drep na stam di e mata sino ten'é na un distansha di mas o ménos 20-25 cm.

Mantenshon di e kultivo, kosecha i produkshon

Kita tur fruta ku ta skèr. Tin di kosechá ora e frutanan ta grandi i e koló kuminsá bira mas skur.

E produkshon por alkansá mas o ménos 300- 400 kg di fruta pa kada 100 m² (3- 4 kg di fruta pa kada m²).

Malesa i plaga

Malesa no ta afektá berehein frekuentemente, pero White fly, Akaro kòrá i Treps sí sa ataké de bes enkuando. Tambe e por keda afektá pa nematodo. E nematodonan akí ta afektá tur e matanan den e mesun famia di SOLANACEAE i por plama fásil di un kultivo pa otro (tin otro tipo di nematodo ku ta afektá matanan di otro famia). No planta kultivonan di mesun famia banda di otro ni planta nan direktamente despues di otro riba e mesun plòt tampoko. Si bo tabatin problema ku nematodo mester warda dos aña promé ku planta mata di e mesun famia riba òf banda di mesun plòt atrobe. E síntomanan di un atake

Antrua (*Solanum macrocarpon*)



Antrua, fruta i flor

Famia: SOLANACEAE
Sinónimo (otro nòmber): Anthora, African Egg plant.
Un sinónimo na Latin ta *Solanum indicum*. Ta kultiv'é hopi na Sürnam.

Orígen i karakterístikanan general:

E ta originá na Afrika. E ta un mata estriktamente tropikal. E mester di hopi solo i no ta wanta friu. E frutanan ta rondó i tin koló blanku/krèm/bèrdè. Ta kita e frutanan promé ku nan hecha i ta herebé nan. Por herebé i kome e blachinan tambe.

Siklo di kultivo, mantenshon di e kultivo, kosecha i produkshon, malesa i plaga

Antrua ta famia serkano di Berehein, tur dos ta pertenesé na e género *Solanum*. E ta sensitivo pa e mésun plaga i malesanan. Wak bou di berehein i sigui mes un prosedura. Durashon di kultivo tambe ta igual. E produkshon sí ta mas abou. Antrua por produsí 185 kg di fruta/100 m²

di nematodo ta, ku e planchi no ta krese mas; desinfektá e tera ku Vydate G (Vydate den forma granular) si no por haña Vydate G usa Vydate L òf Diazinon òf Mocap. Treps sa afektá e koló skur di e fruta, usa Admiral en kombinashon ku Vydate L. No spùit Kelthane (Dicofol) riba mata yòng di berehein, e ta tòksiko pa e matanan yòng.

Bunita flor di nos mes



E yobidanan ku tin últimamente ta pone hopi flor bunita sali na nos mata i palunan den naturalesa. Flornan bunita, manera esnan ku por mira aki. Ta djis tres. Tin hopi mas.



UP TO
60% OFF

on selected baby items



GREY SOFA BED

\$839



70% OFF

COFFEE TABLE / CHEST

REDUCED PRICE
\$233

END TABLE

REDUCED PRICE
\$147



40% OFF

*riba artikulonnan selektá

EXTENDED
FIN DI AÑA
UP TO 70% OFF*



City Shop

Smart shopping ▶ Better living

🏠 Kaya International #36
☎️ +599 717.36.66

🌐 www.cityshopbonaire.com
✉️ info@cityshopbonaire.com

📱 City Shop Bonaire
📞 +599 700.64.42